

ԼՈՌՎԱ ԳՅՈՒՂԱՑԻՈՒԹՅԱՆ ՊԱՅՔԱՐԸ ՀՈՂԻ ՀԱՄԱՐ
(1880—90-ական թվականներ)

ՎԱՋԵ ՀՈՎԱԿԻՄՅԱՆ

XIX—XX դդ. սահմանագծում Լոռիում կենտրոնացած էր արևելահայ պրոլետարիատի ամենատարածված շրջանը: Այս շրջանի հետ են կապվում նաև Արևելյան Հայաստանի բանվորական շարժման առաջին քայլերն ու մարքսիստական կազմակերպությունների ծնունդը: Ուշագրավ է, որ հենց այստեղ տեղի ունեցավ արևելահայ գյուղացիական շարժումների պատմության մեջ ամենանշանակալից՝ Հաղպատի 1903 թ. ելույթը: Այս հարցերը մեր պատմագիտության մեջ բավականաչափ լուսաբանված են: Սակայն նույնը չի կարելի ասել դարավերջի Լոռվա գյուղացիական շարժումների վերաբերյալ: Հայ գյուղացիության պատմության երախտավոր Վ. Ռշտունին այս կապակցությամբ գրում է. «Բոլորովին պատահական են մեր ունեցած տեղեկությունները Ջանգեղուրի և Լոռվա այդ տարիների (XIX դ. վերջ—Վ. Հ.) գյուղացիական ելույթների մասին: Այդ խնդիրը կարոտ է հատուկ ուսումնասիրության»¹: Նույն միտքն է հայտնում նաև Խ. Ավդալբեգյանը²:

1880-ական թվականներին Լոռվա գյուղացիության ճնշող մեծամասնությունը պետական էր: Դարավերջին Լոռվա պետական գյուղացիական ծխերը կազմում էին ընդհանուրի մոտ 89%-ը³: Ինչպես կալվածատիրական, այնպես էլ պետական գյուղացիությունը հողի մեծ կարիք էր զգում: Այսպես, օրինակ, Բորչալուի գավառում պետական գյուղացիության մեկ շնչին ընկնող հողաբաժինը կազմում էր մինչև 2 դեսյատին⁴, իսկ Լոռվա տեղամասի Ղամշկոտ (Եղեգնուտ) գյուղում՝ 0,71, Քոլագերանում (Անտառա-մոտ)՝ 0,76, Շահալիում (Վահագնի)՝ 0,83, Դարաքենդում (Չորագյուղ)՝ 0,93 դեսյատին և այլն⁵:

Դրությունն ավելի վատթար էր Լոռվա կալվածատիրական գյուղերում, որտեղ մեկ ծխին ընկնող հողաբաժինը մոտ 2,3 դեսյատին էր: Իսկ Ուրնակ

¹ Վ. Ռշտունի, Ուրվագծեր Հայաստանի գյուղացիության պատմության, հ. Բ, Երևան, 1968, էջ 128:

² Խ. Ավդալբեգյան, Հողային հարցը Արևելյան Հայաստանում (1801—1917 թթ.), Երևան, 1959, էջ 149:

³ ՎՍՍՀ պետական կենտրոնական պատմական արխիվ (այսուհետև՝ ՎՍՍՀ ՊԿՊԱ), ֆ. 244, ց. 3, գ. 390, թ. 6, 43, ֆ. 17, ց. 1, գ. 2294, թ. 28—29, «Материалы для изучения экономического быта государственных крестьян Закавказского края» (այսուհետև՝ «Материалы...»), т. VII, Тифлис, 1887, էջ 483:

⁴ И. Антелава, Государственные крестьяне Грузии в XIX веке, т. II, Тбилиси, 1962, էջ 311:

⁵ «Материалы...», т. VII, էջ 515—518:

(Ակններ) և Սանահին գյուղերում այն համապատասխանաբար կազմում էր 1,7 և 1,3 դեկայտին⁶։ Ականատեսի վկայությամբ՝ «Լոռու ազնվականաց գյուղերում բնակվող գեղջուկները այնպես են ճնշված իրենց ազնվականներից, ինչպես ճանապարհի միջին բսած խոտը, որին ամեն անցնող տրորում, ոտնատակ է տալիս»⁷։

Լոռվա կալվածատիրական գյուղացիության անապահով կյանքի նկարագիրը կարելի է գտնել Ալ. Շիրվանզադեի «Լոռվա ձորերում» ակնարկում, որը նա գրել է 1888 թ. Լոռիում կատարած շրջագայության ազդեցությամբ։ «Որնակ գյուղն իր արտաքին տեսքով ավելի ողորմելի երևաց ինձ, քան Հաղբատը, — գրում է Շիրվանզադեն — խոտից, փայտից և տեղ-տեղ խճից մի կերպ հորինած խղճուկ խրճիթների մի քանի շարք — դա է գյուղը։ Մանուկները մերկանդամ, կանայք ոտաբոբիկ, տղամարդիկ ընկճված դառն աշխատանքի և աղքատության լժի ներքո, խեղճ, ողորմելի, միանգամայն ողորմելի արարածներ։

Թե՛ Հաղբատ, և թե՛ այստեղ հողի ահագին պակասություն ունեն գյուղացիները։ Շրջակայքը անմերձեհալի ժայռեր և անտառապատ սարեր, երկրագործության պիտանի հողի մի փոքրիկ տարածություն, ճանապարհների կատարյալ բացակայություն — ահա գյուղը, ահա գյուղացիների վիճակը։

Այս փավական չէ. Հաղբատում գանգատներ էին լսվում, թե կալվածատեր ոմն իշխան Բարաթովը հետզհետե խլում է գյուղի հողերը, թե գյուղացիները քանի գնում այնքան աղքատանում են»⁸։

Լոռվա հողասակավ գյուղացիությունը ստիպված էր համառ պայքար մղել իր ամենակենսական հարցի՝ հողի համար, դիմելով պայքարի մեծ մասամբ պասսիվ, երբեմն էլ ակտիվ ձևերի։ Գյուղացիական խնդրագրերի ու բողոքագրերի պատասխանները իշխանության տեղական և բարձրագույն մարմինները համառորեն ձգձգում էին և պատահական չէ, որ գյուղացիության պայքարը գնալով ստանում էր համառ բնույթ։

Բորչալուի գավառի պետական գյուղացիների տնտեսական կյանքն ուսումնասիրող Ալ. Նրիցյանը նշում է, որ գավառում շրջագայելիս Լոռվա տեղամասի համարյա բոլոր գյուղերի բնակիչներն իրեն բողոքներ են ներկայացրել սակավահողության, հողերի զավթման, կալվածատերերի ու անտառային տեսչության ճնշումների, ավազակության կապակցությամբ⁹։ Լոռվա տեղամասի ոստիկանության պետի գրասենյակում 1885 թ. դեռևս լուծում չէին ստացել 1878—1884 թթ. վերաբերող 476 գործ։ Միայն 1885 թ. այդտեղ ընդունվել էր 2676 գործ, իսկ գավառապետի գրասենյակում՝ 7552¹⁰։ Իրանց ճնշող մեծամասնությունը գյուղացիական խնդրագրեր ու բողոքագրեր էին։

1880 թ., երբ Թիֆլիսի նահանգապետը ժամանել էր Զալալօղլի (Ստեփանավան), Լոռվա տեղամասի շատ գյուղեր խնդրագրերով ու բողոքագրերով ներկայացուցիչներ են ուղարկում նրա մոտ։ Նահանգապետը խոստա-

⁶ 2. Մելիքյան, Մարքսիստական կազմակերպությունները և ռևոլյուցիոն շարժումները Լոռում. Երևան, 1957, էջ 13։

⁷ «Արձագանք», 1896, № 72։

⁸ Ալ. Շիրվանզադե, Երկերի ժողովածու, հ. 9, Երևան, 1961, էջ 36—37։

⁹ «Материалы...», т. VII, էջ 416—424։

¹⁰ ՎՍՍՀ ՊԿՊԱ, ֆ. 17, ց. 1, գ. 2294, թ. 35։

նում է զբաղվել նրանց հողով բավարարելու հարցով¹¹։ Նա Կովկասի փոխարքային գրում է, որ լրացուցիչ հողեր ստանալու ակնկալությամբ լոռվա տեղամասի պետական բոլոր գյուղերի բնակիչների կողմից իր հասցեով անդադար ստացվում են նորանոր խնդրագրեր։ Նահանգապետը նպատակահարմար է գտնում կազմել հատուկ հանձնաժողով, որը պետք է զբաղվեր լոռվա գյուղացիության հողային հարցերի քննարկմամբ և գյուղերի միջև հողի հավասարաբաժանման վերաբերյալ նախագծի կազմմամբ։

1881 թ. Սղնախի գավառապետ կոմս Տիգենհաուզենի գլխավորությամբ ստեղծվում է նման հանձնաժողով¹²։ Սակայն տարի ու կես ձգձգվում է աշխատանքներն սկսելու համար անհրաժեշտ մի քանի հարյուր ռուբլի տրամադրելու հարցի լուծումը, և հանձնաժողովը ձեռնամուխ է լինում գործի միայն 1882 թ. կեսերին։ Թե որքան գոյատևեց և ինչպիսի արդյունքների հասավ «Լոռվա հանձնաժողովը», տեղեկություններ չկան։ Սակայն վերջինիս գործունեության իրական հանրագումարն ու գնահատականը կարելի է գտնել գյուղացիական այն բազում խնդրագրերում ու բողոքագրերում, որոնց հոսքը հետագա տարիներին ամենևին էլ չպակասեց։

Հարևան գյուղերի հետ հողային վեճերի կարգավորման և լրացուցիչ հողեր ստանալու նպատակով Բորչալուի գավառի կոռի (կոռի բերդ) գյուղի բնակիչները 1880 թ. Թիֆլիսի նահանգապետին գրում են, որ իրենք արդեն երրորդ անգամ են դիմում, սակայն դրուեթյունը շարունակում է մնալ նույնը։ 1881 թ. նույն հասցեով գյուղացիներն ուղարկում են շորրորդ խնդրագիրը, 1884 թ.՝ հինգերորդը։ 1900 թ. կոռի գյուղի բնակիչները դիմում են արդեն Կովկասի կառավարչապետին, սակայն նրանց խնդրանքը կրկին մնում է անհետևանք¹³։

Պետական ազատ հողերի վրա տեղափոխվելու ակնկալությամբ Բորչալուի գավառի Ղզրլթխիսա (Ղզրլդաշ) գյուղի 18 սակավահող ընտանիքներ 1891 թ. դիմում են պետական ունեցվածքների մինիստրին։ Գոհացում չստանալով, մեկ տարի անց նրանք խնդրագիրը հասցեագրում են Ալեքսանդր III-ին¹⁴։ Նույնպիսի խնդրանքով 1894 թ. Կովկասի կառավարչապետին են դիմում Աքորի գյուղի բնակիչները։ 1898 թ. նրանց երկրորդ փորձը նույնպես մնում է անարդյունք¹⁵։

Լրացուցիչ հողեր ձեռք բերելու նպատակով 1890—1900 թթ. լոռվա տեղամասի Հորարծի գյուղի բնակիչները վերադաս մարմիններին տասնյակ խնդրագրեր են ուղարկել, բայց նրանց խնդրանքը միշտ մերժվել է¹⁶։ Նույնպիսի բախտի են արժանացել նաև 1885 թ. Արճիս և Լճկաձոր, 1889 թ.՝ Գյուլագարակ, 1894 թ.՝ Քոլագերան, 1895 թ.՝ Հայկական Գյառգյառ (Գյառգյառ), 1898 թ.՝ Զալալօղլի և այլ գյուղերի բնակիչների խնդրագրերը¹⁷։

Կապիտալիստական հարաբերությունների զարգացման պայմաններում դարավերջին կոռիում ևս ավելի հաճախակի են դառնում ունևոր անձանց

11 Նույն տեղում, ֆ. 244, ց. 3, գ. 390, թ. 1։

12 Նույն տեղում, թ. 58։

13 Նույն տեղում, ֆ. 17, ց. 1, գ. 9003, թ. 1—4, գ. 9429, թ. 5, ֆ. 12, ց. 10, գ. 1157, թ. 3։

14 ՍՍՀՄ պետական կենտրոնական պատմական արխիվ (այսուհետև՝ ՍՍՀՄ ՊԿՊԱ) ֆ. 381, ց. 27, գ. 17327, թ. 1, 11—12։

15 ՎՍՍՀ ՊԿՊԱ, ֆ. 12, ց. 10, գ. 836, թ. 1—2։

16 Նույն տեղում, ֆ. 244, ց. 4, գ. 704։

17 Նույն տեղում, ֆ. 12, ց. 10, գ. 424, 817, ֆ. 244, ց. 3, գ. 514, 773, ց. 4, գ. 810։

կողմից գյուղացիական հողաբաժինների զավթման դեպքերը: Այդպիսիք տեղի են ունեցել Լոռվա Զալալօղլի, Օձուն, Խաչիգյուղ (Դեբեդ), Դսեղ (Թումանյան) և բազմաթիվ այլ գյուղերում¹⁸:

Ուշագրավ է Բորչալուի գավառի Շնող գյուղի բնակիչների և իշխան Բարաթովի միջև ծավալված հողային վեճը: Դեռևս 1893 թ. Թիֆլիսի դատական ատյանը քննելով այդ վեճը, որոշում է անհիմն համարել Բարաթովի հավակնություններն այդ հողերի նկատմամբ: Չցանկանալով հաշտվել այդ որոշման հետ, Բարաթովը 1896 թ. մարտին դիմում է Նիկոլայ II-ին: Հիշեցնելով զահին իր նախնիների մատուցած «հավատարիմ և անձնուրաց ծառայությունները», նա թագավորին խնդրում է պաշտպանել իր «իրավունքները»¹⁹: Գործն անմիջապես վերանայման է ենթարկվում: Հողագործության և պետական գույքերի մինիստրության լիազորն այդ կապակցությամբ լրացուցիչ տեղեկություններ է ուղարկում Պետերբուրգ: Դրանցից պարզվում է, որ վիճելի հողերից, որոնք կազմում էին 1543 դեսյատին (անտառ, վարելահող, խոտհարք և այլն), հնուց ի վեր օգտվել են մոտակա Շնող գյուղի բնակիչները: Թե որքանով են անհրաժեշտ այդ հողերը շնողցիներին, երևում է այն բանից, նշում էր լիազորը, որ 257 ծուխ ունեցող (2800 շոմեշ) գյուղն ունի ընդամենը 400 դեսյատին վարելահող, այսինքն՝ 1,55 դեսյատին ծխին²⁰: Հողագործության և պետական ունեցվածքների մինիստր Նոմոլովը կայսերական գրասենյակին ուղղած իր զեկուցագրում նույնպես ընդունում է այդ հողերի կենսական նշանակությունը Շնող գյուղի բնակիչների համար: Միաժամանակ նա ուշադրություն է հրավիրում հետևյալ հանգամանքի վրա. «Իշխան Բարաթովը պատկանում է Թիֆլիսի նահանգի առավել խոշոր և ունեւոր հողատերերի թվին»²¹, այսինքն առեւ կուզե, որ հարցը գյուղացիների օգտին լուծելու դեպքում Բարաթովի շահերին լուրջ վտանգ սպառնալ չի կարող, քանի որ անհամեմատ փոքր է վերահիշյալ հողերի նշանակությունը այդ մեծահարուստ կապաժատիրոջ համար:

1884 թ. Ուռուտ գյուղի բնակիչները Թիֆլիսի նահանգապետին գրում են, որ կալվածատեր Խան-Աղովը, որը շատ դժբախտություններ է պատճառել իրենց, զավթել է գյուղացիական հողաբաժինները և, ինչպես միշտ, շարունակում է մնալ անպատիժ: Գյուղացիները խնդրում են «մեկընդմիջ ազատել իրենց այդ ազա՛ անձնավորությունից»²²: Խան-Աղովի մասին նույնպիսի վրդովմունքով նահանգապետին գրում են Լոռվա տեղամասի Նովո-Ալեքսանդրովկա (Մաքսիմ Գորկի) գյուղի բնակիչները: Նրանք նշում են, որ արդեն 20 տարի է, ինչ պայքարում են Խան-Աղովի դեմ, որն իրենցից զավթել է 268 դեսյատին հող²³:

Հողատեր Խան-Աղովի հետ ունեցած հողային վեճերը քաջահայտ պայքարի են վերածվում Վարդաբլուր և Կուրթան գյուղերում: Ալ. Նրիցյանը նշում է, որ 1883 թ. դատարանի որոշմամբ Կուրթան գյուղի հողաբաժնից 180 դեսյատին անցավ Խան-Աղովին, որի հետևանքով գյուղացիներն այնպիսի

¹⁸ «Материалы...», т. VII, № 417, 423, ՎՍՍՀ ՊԿՊԱ, ֆ. 116, ց. 1, գ. 865, թ. 20—21:

¹⁹ ՍՍՀՄ ՊԿՊԱ, ֆ. 396, ց. 9, գ. 107, թ. 4:

²⁰ Նույն տեղում, թ. 5:

²¹ Նույն տեղում, թ. 8:

²² ՎՍՍՀ ՊԿՊԱ, ֆ. 17, ց. 1, գ. 9429, թ. 1:

²³ Նույն տեղում, թ. 22:

դրության մեջ դրվեցին, որ որոշեցին հարևան վարդաբլուրցիների հետ մեկտեղ (նրանցից էլ հան-Աղովը զավթել էր ավելի քան 109 դեսյատին հող) դիմագրավել իշխանութուններին²⁴։ Այսպիսով, ընդդիմանալով Թիֆլիսի դատական ատյանի որոշմանը, համաձայն որի իրենց օգտագործման տակ գտնվող պետական հողերի որոշ մասը դառնում էր հան-Աղովի սեփականությունը, Կուրթան և Վարդաբլուր գյուղերի բնակիչները զինված դիմադրություն ցույց տվեցին իշխանության ներկայացուցիչներին²⁵։

1884 թ. ամռանը, երբ հողաչափ Սարկիսովը փորձում էր սահմանագծել վիճելի հողերը, երկու գյուղերի բնակիչները շրջապատեցին նրան և մահվան սպառնալիքով պահանջեցին դադարեցնել աշխատանքները։ Հողաչափը ստիպված փախչում է Թիֆլիս։ Հուլիս ունենալով փոխել դատական ատյանի որոշումը, գյուղացիները, խնդրարկության նպատակով, Պետերբուրգ են ուղարկում իրենց ներկայացուցիչներին։ Թիֆլիսի նահանգապետի կարգադրությամբ՝ Սարկիսովը սեպտեմբերի 18-ին նորից է հայտնվում սահմանագծման վայրում՝ կազակների և ոստիկանության աստիճանավորների ուղեկցությամբ։ Այստեղ նախապես հավաքված կուրթանցիներն ու վարդաբլուրցիները (մոտ 200 հոգի) խնդրում են մինչև Պետերբուրգից իրենց համագյուղացիների վերադառնալը հետաձգել սահմանագծման աշխատանքները։ Մերժում ստանալով, նրանք հարձակվում են աստիճանավորների և կազակների վրա։ Իշխանության ներկայացուցիչները դիմում են փախուստի։ Զայրացած ամբոխը նրանց հետևում է անջնային, մինչև որ կազակները կրակ են բացում օդում²⁶։

Սակայն շուտով Կուրթան և Վարդաբլուր գյուղերի բնակիչների ելույթը ճնշվում է։ Մի քանի շաբաթով 100 կազակներից բաղկացած էկզեկուցիա է նշանակվում այդ գյուղերում²⁷։ Թիֆլիսի նահանգապետը շտապում է կառավարչապետին ղեկուցել, որ դրությունը խաղաղվել է, գործը հանձնվել հետաքննության, իսկ «անկարգության» գլխավոր մեղավորները ձերբակալվել են։ Կառավարչապետը Թիֆլիսի դատական ատյանի դատախազին միջնորդում է, որ այդ գործին հատկացվի հատուկ ուշադրություն և որ «անկարգության» գլխավոր մեղսակիցները պատժվեն²⁸։ Այդպես էլ լինում է։ 25 գյուղացիներ նստում են մեղադրյալի աթոռին²⁹։

Կուրթան և Վարդաբլուր գյուղերի բնակիչների պայքարը հողի համար չի դադարում նաև հետագա տարիներին։ հան-Աղովի հետ ունեցած վիճի կապակցությամբ, 1888 թ., կուրթանցիները դիմում են նույնիսկ Ալեքսանդր III-ին³⁰։ Ահա թե 1897 թ. նրանք ինչ են գրում Կովկասի կառավարչապետին. «Վիճելի հողերի վերաբերյալ թող հարցնեն շրջակա գյուղերի բնակիչներին, որոնց վրա հան-Աղովները ոչ մի իրավունք չունեն, բացի ուժեղի իրավունքից»³¹։

24 «Материалы...», т. VII, էջ 419։

25 ՎՍՄԶ ՊԿՊԱ, ֆ. 12, ց. 16, գ. 30։

26 Նույն տեղում, թ. 2—3։

27 «Материалы...», т. VII, էջ 419։

28 ՎՍՄԶ ՊԿՊԱ, ֆ. 12, ց. 16, գ. 30, թ. 3, 7։

29 Նույն տեղում, ֆ. 116, ց. 1, գ. 694, թ. 2։

30 ՍՄԶՄ ՊԿՊԱ, ֆ. 1405, ց. 90, գ. 7164։

31 ՎՍՄԶ ՊԿՊԱ, ֆ. 12, ց. 1, գ. 2351, թ. 6։

1893 թ. ապրիլին գյուղացիական լուրջ հուզումներ են տեղի ունենում Մեծ Ղարաքիլիսա (Կիրովական) գյուղում³²։ Մեծահարուստ կալվածատիրուհի Բագրատիոն-Մուխրանսկայան, որը տարիներ շարունակ իր հողերը վարձակալման էր հանձնում Մեծ Ղարաքիլիսա և Շիշթափա գյուղերի բնակիչներին, հետագա վարձակալման պայմանների շուրջ վերջիններիս հետ համաձայնության չգալով, ցանկանում է հողերը տրամադրել Նովո-Միխայլովկա գյուղին։ 1893 թ. պետական ունեցվածքների միևնույնությունն այդ հողերի փոխարեն Մեծ Ղարաքիլիսա և Շիշթափա գյուղերին հող է հատկացնում Ալեքսանդրապոլի գավառում։ Սակայն գյուղացիները, որոնք ավելի քան 70 տարի ապրում և աշխատում էին այդ արգավանդ հողերի վրա, չցանկացան դրանք փոխարինել անմշակ հողերի հետ։ Նրանք հրաժարվում են կատարել կալվածատիրոջ կամքը, հետևաբար և ճանաչել նրա սեփականատիրական իրավունքներն այդ հողերի նկատմամբ և կազմակերպված ոտքի են կանգնում իրենց շահերը պաշտպանելու։ Մեծ Ղարաքիլիսա և Շիշթափա գյուղերի բնակիչները համոզված էին, որ եթե նովոմիխայլովցիներին թույլ չտան վարձակալել այդ հողերը, ապա Բագրատիոն-Մուխրանսկայան, ի վերջո, տեղի կտա։

Հարցը կարգավորելու նպատակով մի խումբ հեծյալ ստորադրյալների ուղեկցությամբ Նովո-Միխայլովկա է գալիս Լոռվա պրիստավը։ Նրա ներկայությամբ անգամ նովոմիխայլովցիները չեն կարողանում մոտենալ Մեծ Ղարաքիլիսա գյուղի հողերին, որովհետև այնտեղ նախապես հավաքված են լինում պատահական միջոցներով զինված զարաքիլիսցիները։ Գյուղացիները հարձակվում են պրիստավի և հեծյալների վրա։ Երբ պրիստավը հրամայում է ձերբակալել առավել ակտիվ գյուղացիներին մեկին, գյուղացիները գոչերով, որ իրենք բոլորն են ապստամբում, թափվում են հեծյալների վրա և աղատում իրենց համագյուղացուն։ Վերջինիս նորից են ձերբակալում և տեսարանը նույնությամբ կրկնվում է։ Լոռվա պրիստավը Բորչալուի գավառապետին գրում էր. «Դա պատահական հավաք չէր, այլ համարյա հրամանով գործող բավական կազմակերպված ամբոխ։ Լուրեր են պտտվում, որ զարաքիլիսցիները նախապես միմյանց զրավոր պարտավորություն էին տվել ոչ մի բանի առաջ չնահանջել և հարկ եղած դեպքում օգտագործել նույնիսկ զենք»³³։

Արխիվային նյութերը խոսում են զարաքիլիսցիների և շիշթափացիների տեական պայքարի մասին, որոնք պատրաստ էին հողի համար «մորթոտ» վել մինչև վերջին մարդը, ավելի շուտ ուտել այդ հողը, բայց չզրկվել դրանից»³⁴։ Այդ նյութերը, սակայն, խոսում են նաև այն համառության մասին, որով իշխանությունները ձգտում էին կատարել Բագրատիոն-Մուխրանսկայայի կամքը։ Գավառապետին ուղղած զեկուցագրում Լոռվա պրիստավը նշում է, որ առանց զինվորական լուրջ օգնության հնարավոր չէ զարաքիլիսցիներին հնազանդ պահել և քանի որ ինքը հնարավորություն չունի մշտապես գտնվելու Շիշթափայում և Մեծ Ղարաքիլիսայում, ապա ընդհարումներից խուսափելու նպատակով խնդրում է վերահիշյալ գյուղերում կազակներ պահել։ Միա-

³² Նույն տեղում, ֆ. 17, ց. 1, գ. 3338։

³³ Նույն տեղում, թ. 5։

³⁴ Նույն տեղում, թ. 5, 17։

ժամանակ հարկավոր է այդ գյուղերի բնակիչներին հասկացնել տալ, որ այդ հողերն իրենց համար առհավետ կորած են³⁵:

Գյուղացիների ըմբոստացման բուրն անհանգստացնում է նաև Թիֆլիսի նահանգապետին, որը շտապում է Կովկասի կառավարչապետ Շերեմետևին տեղեկացնել, որ կարգ ու կանոնի վերականգնման և գլխավոր մեղավորների ձերբակալման նպատակով Մեծ Ղարաքիլիսա է ուղարկվել 15 կազակ: Հետագա լուրջ հուզումներից խուսափելու նպատակով նահանգապետը կառավարչապետից թույլտվություն է խնդրում Մետեխի բանտը նետել առավել ակտիվ գյուղացիներին³⁶: Կառավարչապետը նահանգապետից պահանջում է հետևյալը. «Հաշվի առնելով Շիշթափա և Մեծ Ղարաքիլիսա գյուղերի բնակիչների կողմից հողերի բռնի գրավումը, ոստիկանությանը համառ դիմադրություն ցույց տալը, պաշտոնատար անձանց վիրավորելը, ես անհրաժեշտ եմ համարում մեղավորներին օրինակելի պատժի ենթարկել և դրա համար Մեծ Ղարաքիլիսա գյուղն էկզեկուցիայի ենթարկել երկու շաբաթով, ուղարկելով այնտեղ կազակների կես հարյուրյակ (մթերքը բնակչության հաշվին): Միաժամանակ բանտ նետել անկարգության գլխավոր մասնակիցներին: Ի կատարումն սրանց՝ կտպասեմ Ձեր զեկուցագրին»³⁷: Կովկասի կառավարչապետը էկզեկուցիա է նշանակում, որպեսզի, ինչպես ինքն է նշում, բնակչությանը պարզ լինի «իր վարքագծի ողջ հանցանքը», որ ապագայում ամենափոքրագույն անկարգության դեպքում իսկ կձեռնարկվեն կտրուկ վարչական խիստ միջոցառումներ³⁸:

Առավել ակտիվ տասը գյուղացիներ նետվում են Մետեխի բանտը: Նրանք Թիֆլիսի նահանգապետին գրում են, որ անարդարացի են համարում իրենց դեմ ուղղված մեղադրանքը և խնդրում վերջինիս՝ ճիշտ ընթացք տալ գործին և օգնել իրենց, քանի որ բարոյական-ֆիզիկական տանջանքի են ենթարկվում ոչ միայն իրենք, այլև իրենց դժբախտ ընտանիքները, որոնք հանձնվել են բախտի քմահաճույքին³⁹: Շատ հասկանալի պատճառով նահանգապետը մերժում է այդ խնդրանքը:

Արևիվային գործում գյուղացիական այս ելույթի վերաբերյալ այլ տեղեկություններ չկան, սակայն եղածն էլ բավարար հիմք է տալիս ասելու, որ հողի համար Մեծ Ղարաքիլիսա և Շիշթափա գյուղերի բնակիչների պայքարը Արևելյան Հայաստանի XIX դ. վերջի գյուղացիական շարժումների առավել նշանակալից դրվագներից է:

Բագրատիոն-Մոսխրանսկայայի հողերի փոխարեն Մեծ Ղարաքիլիսա և Շիշթափա գյուղերի բնակիչներին Ալեքսանդրապոլի գավառում հատկացված հողաբաժինները թե՛ քանակապես, թե՛ որակապես հեռու էին բավարար լինելուց: Այդ են վկայում վերոհիշյալ գյուղերի՝ այդտեղ տեղափոխված բնակիչների բազմաթիվ խնդրագրերը՝ ուղղված վերադառ մարմիններին: 1894 թ. Ղարաքիլիսացիները պետական ունեցվածքների մինիստրի Կովկասի լիազորին գրում են, որ Բագրատիոն-Մոսխրանսկայայի հողերից վտարվելուց հետո

35 Նույն տեղում, Թ. 3—5:

36 Նույն տեղում, Թ. 8:

37 Նույն տեղում, Թ. 11:

38 Նույն տեղում, Թ. 15:

39 Նույն տեղում, Թ. 23:

իրենց հատկացված հողը պիտանի չէ վարելու համար և խնդրում են այլ հողակտոր տրամադրել: 1895 և 1900 թթ. նրանց նոր խնդրագրերը նույնպես մնում են անհետեանք⁴⁰:

1894 թ. նույն հասցեով դիմում են նաև Շիշթափա գյուղի բնակիչները և խնդրում հող տրամադրել այլ վայրերում, սակայն մերժում են ստանում: 1896 թ. Կարսի մարզ տեղափոխվելու նպատակով նրանք դիմում են Կովկասի կառավարչապետին: Գյուղացիները հույս ունենին այնտեղ ստանալ հողալին ազատ տարածություններ: Սակայն նրանց այս խնդրանքը ես մերժվում է: Լրացուցիչ հողեր ձեռք բերելու նպատակով շիշթափացիները 1896 թ. դիմում են թաղավորին, սակայն ապարդյուն⁴²: Դրանից հետո էլ ամեն աարի գյուղացիները նույն հարցը բարձրացնում էին կովկասյան իշխանություններին առջև, սակայն միշտ ապարդյուն⁴³:

Այսպիսով, XIX դ. վերջին Լոռվա գյուղացիության պայքարը տարրեր դրսևորումներ է ունեցել: Այն արահայտվել է խնդրագրերի ու բողոքագրերի ձևով, հաճախ երկշտ անհնազանդության ու պատիվ դիմադրության փորձերով և նկատելի ըմբոսացումներով: Պայքարի այս ձևերը հաճախ լրացնում էին միմյանց, հանգես դալիս հաջորդաբար, իսկ երբեմն էլ՝ միաժամանակ: Վարդաբլուր, Կուրթան, Մեծ Ղարաքիլիսա և Շիշթափա գյուղերի բնակիչների՝ հողի համար մղած երկարաակ պայքարը դրա լավագույն դրսևորումն էր: Գյուղացիական այդ հուղումները Լոռվա գյուղացիության զուսակարդային պայքարի ուշագրավ էջերից են:

БОРЬБА ЛОРИЙСКОГО КРЕСТЬЯНСТВА ЗА ЗЕМЛЮ (1880—90-ые годы)

ВАЧЕ ОВАКИМЯН

Резюме

Материалы, освещающие крестьянское движение в Лори, пока немногочисленны. Крестьянство Лори в конце прошлого века испытывало острую земельную нужду. Борьба за землю являлась осью крестьянского движения. Зачастую эта борьба была упорной и продолжительной, как, например, крестьянские волнения в селах Вардаблур, Куртан (1884 г.), Большой Караклис (1893 г.). Эти волнения являются примечательными страницами истории классовой борьбы крестьянства Лори.

⁴⁰ նույն տեղում, ֆ. 243, ց. 5, գ. 376, թ. 7, 11, ՍՍՀՄ ՊԿՊԱ, ֆ. 396, ց. 2, գ. 618:

⁴¹ ՎՍՍՀ ՊԿՊԱ, ֆ. 243, ց. 5, գ. 332:

⁴² ՍՍՀՄ ՊԿՊԱ, ֆ. 381, ց. 29, գ. 18770:

⁴³ ՎՍՍՀ ՊԿՊԱ, ֆ. 243, ց. 5, գ. 332: